

**ILUARSISSUT**

Inatsimmut nassuiaatit 22. august 2022-meersoq taarserpai  
(Oqaasertaasigut iluarsisoqarpoq)

Siunnersuummut nassuiaatit

**Nassuiaatit nalinginnaasut****1. Aallaqqaasiut****1.1. Siunnersuutip pingaarnertut tunngavia**

Siunnersuutip matuma Inatsisartunut ilaasortanut Nuummi najugaqanngitsunut ukiumut ataasiarlutik ataatsimiinnermut peqataanermut atatillugu meeqqanik aapparisamillu ingiallorteqarsinnaanerannut pisinnaasaannik annertunerulersitsinermik periarfissiissaaq.

Siunnersuut Siulittaasoqarfimmiit Inatsisartut sulinerminni ilaqutaqarnermut tunngatillugu atugaasa tulluarsarnissaannut iliuseqarnermut atassuteqarluni saqqummiunneqarpoq.

Siunnersuut ilaasortanut ataatsimiinnertut peqataajartulernerminni meeqqaminnik Nuummut nassarnissaminnik pisariaqartitsisunut pitsaanerusumik sinaakkusersuerusunnerminngaanniit annerusumik aallaaveqarpoq. Minnerunngitsumik ilaasortanut meeqqaminnik kisimiillutik najugaqateqartunut atuuppoq.

**2. Siunnersuummi immikkoortut pingaarnertit****2.1. Inatsisitigut atuuttut**

Inatsisartut Suleriaasianni § 38, imm. 2-3-mi allassimavoq, Inatsisartut ikinnerpaamik ukiumut marloriarlutik ileqquusumik ataatsimiittassasut, tamatumalu saniatigut immikkut ittumik ataatsimiigiaqqusisoqarsinnaalluni. Aammattaaq Inatsisartut Suleriaasianni § 1-imi allassimavoq, nutaamik qinersereernerup kingorna kingusinnerpaamillu ullut 45-t qaangiunnerisigut Inatsisartut inissitsiterfiusumik katersuunnissamut ataatsimiigiaqquneqassasut.

Inatsisartunut ilaasortanut Nuummi najugaqanngitsunut ataatsimiinnerit ingerlanneqartillugit Inatsisartunut Naalakkersuisunilu il. il. ilaasortat aningaasarsiaqartitaanerit il. il. pillugit Inatsisartut inatsisaanni (Inatsisartuni Naalakkersuisunilu il. il. ilaasortat aningaasarsiaqartitaanerit il. il. pillugit Inatsisartut inatsisissaat nr. 22, 18. december 2003-meersoq, kingorna allanguuteqarnikoq) § 4-mi ataatsimiinnermut atatillugu ilaqqutanik ingiallorteqarnissamut pisinnaatitaanerit maleruagassanik aalajangersagaqarpoq.

§ 4, imm. 1, Inatsisartunut ilaasortat Nuummi najugaqanngitsut qaammatisiutit malillugit ukiut tamaasa ataasiarlutik aapparisaat Inatsisartut ataatsimiinnerannut atatillugu ingialluinnermi angalanermut ineqarnermullu akiliunneqartarnissaannik pisinnaatitsivoq.

§ 4, imm. 2, aappariinnermut naligititassaq tassaavoq inuit nalunaarsorsimaffianni najugaqatigiittut nalunaarsorneqarluni ukiumi ataatsimi inooqatigiissimaneq. Taamaalilluni Inatsisartunut ilaasortat katisimanngitsut minnerpaamik ukiumi ataatsimi aappariissimasut Inatsisartunut ilaasortatut katisimasutuulli ilaquttanik ingiallorteqarnissaminut pisinnaatitaaffeqarput.

§ 4, imm. 3, Inatsisartunut ilaasortat Nuummi najugaqanngitsut qaammatisiutit malillugit ukiut tamaasa ataasiarlutik qitornai Inatsisartut ataatsimiinnerannut atatillugu ingialluinnermi angalanermut ineqarnermullu akiliunneqarnissaannut pisinnaatinneqarput. Angerlarsimaffimmi najugalinnut 18-illu inorlugit ukiulinnut taamaallaat atuuppoq.

§ 4, imm. 4, Inatsisartunut ilaasortat Naalakkersuisuni ilaasortaajutigippata ingiallorteqarnissamut pisinnaatitsiunnaarnermik aalajangersaavoq.

## 2.2. Siulittaasoqarfiup eqqarsaatersuutai

Nalinginnaasumik ukiumut ataatsimiinnerit marluk Inatsisartut ingerlattarpaat, tamarmik qaammatinik marlunniit pingajuata qeqqa tikillugu sivisussuseqartarlutik.

Naluneqanngitsutut Inatsisartunut ilaasortanut Nuummi najugaqanngitsunut meeralinnullu ataatsimiinnernut peqataasarneq ilaqtariinnermut pikkunarsinnaasarpoq.

Ingammik ilaasortanut meeqqaminnik kisermaassisunut ataatsimiinnernut peqataaneq aamma ajornartorsiutitaqarsinnaasarluni.

Taakkua atukkat innuttaasunut Nuummi najugaqanngitsunut naalakkersuinikkut tunniussassaqarluartunut Inatsisartunut qineqqusaanngitsoortitsisinnaanerannik kinguneqarsinnaallutik. Imaluunniit meeqqami pisariaqartitaannik tunniussaqsinnaanissamut atorfik ataqatigiissitsiffiunngitsutut misigalugu qinikkatut isernerup kingorna anisariaqarneq pisinnaalluni.

Tamanna alianaannangilaq, aammali tamat oqartussaanerannut ajoqutaavoq.

Inatsisartut ataatsimiinnerisa ingerlanneqartarnerannut killiliussat sapinngisamik tassani inissisimasunut tulluarsaalluni ilusilerneqartariaqarput.

Tamanna tunngavigalugu, ilaquttanik ingiallorteqarnermut aqqissuussinerup annertusinissaa, tassa Inatsisartunut ilaasortat Nuummi najugaqanngitsut qaammatisiutit ukiut affakkarlugit ataasiarlutik ilaquttaminnik ingiallorteqarsinnaanerat pisinnaatitaaffiussasoq, imaalillunilu ilaasortat meerartallit aappaminnit ilagineqanngikkunik meeqqat paaqqutarinissaannut

ikiortaasinnaasumik inersimasumik allamik ingiallorteqarnissaminnut periarfissaqalernissaat Siulittaasoqarfiup siunnersuutigaa.

### 2.3. Siunnersuut

Inatsisartunut ilaasortanut Nuummi najugaqanngitsunut ataatsimiinnernut atatillugu ilaquttanik ingiallorteqarnermi pisinnaasat annertusinissaat siunnersuutip malitsigissavaa.

Siunnersuutikkut ilaasortat Nuummi najugaqanngitsut ilaquttanik ingiallorteqarnermik pisinnaalersinneqassapput (aapparisaq qitornallu 18-it inorlugit ukiullit angalanermut ineqarnermullu akiliunneqartassapput) qaammatisiutit malillugit ukiut affakkaarlugit ataasiaq pisinnaalluni.

Inatsisit atuuttut malillugit Inatsisartunut ilaasortat Nuummi najugaqanngitsut qaammatisiutit malillugit ukiumut ataasiaannaq ilaquttanik ingiallorteqarsinnaapput.

Aammattaq siunnersuummi ilaavoq, ilaasortat qitornai 18-it inorlugit ukiullit angerlarsimaffimmi najugallit Inatsisartut ataatsimiinnerannut atatillugu ingialluippata, inersimasoq ingiallortaasoq alla, aapparinnngisaq, angalanermut ineqarnermullu akiliunneqassasoq.

### **3. Pisortanut aningaasatigut allaffissornikkullu kingunissai**

Ilaasortat Nuummi najugaqanngitsut qaammatisiutit malillugit ukiumut marloriarlutik aapparisaat aamma qitornai 18-it inorlugit ukiullit angerlarsimaffimmi najugallit Inatsisartut ataatsimiinnerannut atatillugu angalanermut ineqarnermullu akiliunneqartarnissaat (ilaquttanik ingiallorteqarneq) siunnersuutip periarfissanngortissavaa.

Massakkut ilaasortat aapparisaasa meeraasalu angerlarsimaffimmi najugallit 18-it inorlugit ukiullit ataatsimiinnermut atatillugu angalanermut ineqarnermullu akiliunneqartarnerat qaammatisiutit malillugit ukiumut taamaallaat ataasiarluni pisinnaavoq.

Tamatuma malitsigisaanik aningaasartuutaanerusussat eqqarsaatigalugit tamatumani pissutsinit assigiinngitsut apeqqutaapput, soorlu ilaasortat Nuummi najugaqanngitsut amerlassusii, meeraasa angerlarsimaffimmi najugaqartut amerlassusii, ilaasortallu pineqartut nunap sortaani najugaqartuuneri. Pissutsit tamakku qinigaaffimmiit qinigaaffimmut aammalu ukiumiit ukiumut allanngorarsinnaapput.

2021-mi ilaasortat ilaquttanik ingiallorteqarnermut pisinnaaffimminnik atuisimasut katillugit 21-upput, malitsigisaanik angalanermut aningaasartuutit katillugit 627.320 kr.-ullutik. 2020-mi ilaasortat ilaquttanik ingiallorteqarnermut pisinnaaffimminnik atuisimasut katillugit 12-iupput, malitsigisaanik angalanermut aningaasartuutit katillugit 284.457 kr.-ullutik.

2021-mi ilaasortat ilaquttanik ingiallorteqarnermut pisinnaaffimminnik atuisimasut amerlassusaat amerlaginarsinnaagaluartut ukiup 2021-p qinersiffiusimanera

eqqarsaatigineqassaaq, taamatullu ilaasortaareersut ilaasortannortullu ukiumut ataasiarlutik ilaquttaminnik ingiallorteqarsinnaanertik atorsimallugu.

Angalanermut aningaasartuutit (timmisartumut billettit il. il.) saniatigut ilaquttanik ingiallorteqarsinnaanermut aaqqissuussinerup ataatsimiinnerup nalaani ilaasortanut Nuummi inissaannut aningaasartuutit amerlanerusinnaapput, uani assersuutigalugu ilaqutariinnut tallimanik inuttaqartunut ineqarnermut aningaasartuutit, Inatsisartunut ilaasortap kisimiittup inissaaniit aningaasartuutit annertunerunissai pineqarpoq. Ilaquttanik ingiallorteqarnermut atatillugu maannamut ineqarnermut aningaasartuutit, angalanermut aningaasartuutitut sanilliullugit, amerlanerussusaat annikipput.

Ataatsimut isigalugu ukiumut aningaasartuutit 500.000 kr.-inik amerlinissaat naatsorsuutigineqassaaq, kisiannili annertuumik nikerarsinnaasassallutik, eqqaaneqareersutummi aningaasartuutit amerlassusaannut apeqqutaasut qinigaaffimmiit qinigaaffimmut ukiumiillu ukiumut allanngorartarneri nikerartuummata.

Siunnersuut Inatsisartut ataatsimiittarnerannut piareersarnermut ingerlatsinermullu ilaasunik allaffissornermut isumalluutinik killilimmik annertunerulersitsissaaq, kisiannili sulisoqarnerulernissaaq pisariaqassanngitsutut nalilerneqarluni.

#### **4. Inuusutissarsiortunut aningaasatigut allaffissornikkullu kingunissai**

Inatsisissatut siunnersuut inuusutissarsiortunut aningaasatigut allaffissornikkullu kinguneqartitsissanngilaq.

#### **5. Avatangiisinut, pinngortitamut innuttaasullu peqqissusiannut kingunissai**

Inatsisissatut siunnersuut avatangiisinut, pinngortitamut innuttaasullu peqqissusiannut kinguneqartitsissanngilaq.

#### **6. Innuttaasunut kingunissai**

Inatsisissatut siunnersuut innuttaasunut kinguneqartitsissanngilaq.

#### **7. Kingunissai pingaaruteqartut allat**

Inatsisissatut siunnersuut allanik pingaaruteqartunik kingunissaqanngilaq.

#### **8. Oqartussanik suliniaqatigiiffinnillu il. il. tusarniaaneq**

Inatsisartunut ilaasortaannngitsunut, siunnersuutip aningaasatigut kingunissai – annertussanganneqanngitsut – eqqaassanngikkaanni, pisinnaatitaaffinnik pisussaatitaaffinnilluunniit ilaqanngimmat aammalu kinguneqartussaannngimmat siunnersuut tamanut ammasumik tusarniutigineqarnikuunngilaq.

## **Siunnersuummi aalajangersakkanut ataasiakkaanut nassuiaatit**

### *§ 1-imut*

Nr. 1-imut

§ 4, imm. 1:

Siunnersuummi § 4, imm. 1-ip oqaasertalerneqarneratigut Inatsisartunut ilaasortat Nuummi najugaqanngitsut qaammatsiutit malillugit ukiut affakkaarlugit aapparisaat aamma qitornai 18-it inorlugit ukiullit angerlarsimaffimmi najugallit Inatsisartut ataatsimiinnerannut atatillugu ingialluinermi angalanermut ineqarnermullu akiliunneqarsinnaatitaapput.

Taamaalillutik Inatsisartunut ilaasortat pineqartut katillugu ukiumut marloriarlutik ilaquttaminnik ingiallorteqarsinnaalissapput: Piffissami januaarip aallartinneraniit juunip naaneranut ataasiarlutik, aamma piffissami juulip aallartinneraniit decembarip naanerata tungaanut ataasiarlutik.

Ilaquttanik ingiallorteqarsinnaanermut pisinnaatitaaffik ataatsimiinnerni suniluunniit atorneqarsinnaavoq, tassa ileqquusumik ataatsimiinnernuinnaanngitsoq kisianni aamma ataatsimiinnernut immikkut ittunut inissitsiterfiusunullu atorneqarsinnaalluni.

§ 4, imm. 2:

Aalajangersakkami ilaasortat qitornai 18-it inorlugit ukiullit angerlarsimaffimmi najugallit Inatsisartut ataatsimiinnerannut atatillugu ingialluinermi angalanermut ineqarnermullu akiliunneqarpata, tassanilu aapparisaq (imaluunniit § 4, imm. 3 naapertorlugu inooqatigisaq) ilaanngippat, inersimasup ingiallortaasup allap angalanermut ineqarnermullu akiliunneqarsinnaanera aalajangersarneqarpoq.

Taamaalilluni Inatsisartunut ilaasortat pineqartut ataatsimiigiarnermi meeqqani ilagippatigit, inersimasoq alla Inatsisartunut ilaasortap aapparinnngisaata, assersuutigalugu aanaajusup aataajusulluunniip ingiallortaatinneqarnissaanut aalajangersakkakkut periarfissiisoqarpoq.

Ingammik Inatsisartunut ilaasortanut meeralinnut kisimiittunut tamanna immikkut sunniuteqassaaq, kisianni aamma aapparisaq ataatsimiinnerup nalaani angalaqataasinnaanngippat, assersuutigalugu sulinissaq peqqutaalluni, sunniuteqassalluni.

Aapparinnngisamik inersimasumik allamik ingiallorteqarsinnaatitaaneq taamaallaat Inatsisartunut ilaasortap ataatsimiinnermut meeqqaminik ingiallorteqartillugu atuutissaaq.

§ 4, imm. 3:

Aalajangersakkami § 4, imm. 2-mik atuuttumik allanngortinnagu ingerlatseqqiiisumi katissimaneq inuit nalunaarsimaffianni najugaqatigiittut nalunaarsorneqarluni ukiumi ataatsimi inooqatigiinnermt naligiissinneqarpoq.

§ 4, imm. 1 malillugu katissimasamut angalanermut ineqarnermullu akiliutsissinnaaneq taamaalilluni taamaaqataanik aapparisaq eqqarsaatigalugu taamaaginnarpoq, aapparisaq sivikinnerpaamik ukioq ataaseq inooqatigisimagaanni.

§ 4, imm. 4:

Aalajangersakkami § 4, imm. 4-imik atuuttumik ingerlatseqqiisumi Inatsisartunut ilaasortat Naalakkersuisunut ilaasortaajutigisut § 4, imm. 1-3-mi aalajangersakkat malillugit ilaqtanik ingiallorteqarsinnaatitaanngitsut aalajangersarneqarpoq.

Naalakkersuisunut ilaasortat aappaasa meeraasalu angalanermut akiliutsissinnaanerit Inatsisartut inatsisaanni § 8 imm. 4 aamma 5-imi aaqqissuussaavoq.

#### *§ 2-mut*

Siunnersuutip atuutilerfissaa aalajangersakkami nalunaarneqarpoq.

<b>Siunnersuut inatsimmut atuuttumut sanilliullugu</b>	
<i>Inatsisip atuuttup oqaasertai</i>	<i>Inatsisissatut siunnersuut</i>
	<b>§ 1</b> Inatsisartuni Naalakkersuisunilu il. il. ilaasortat aningaasarsiaqartitaanerat il. il. pillugit Inatsisartut inatsisaanni nr. 22-mi, 18. december 2003-meersumi, Inatsisartut inatsisaatigut nr. 42, ulloq 23. november 2017-imeersukkut kingullermik allanngortinneqartumi, tulliuttut allanngortinneqassapput:
<p><b>§ 4.</b> Ilaasortanut Nuummi najugaqanngitsunut qaammatsiutit malillugit ukiut tamaasa ataasiarluni Inatsisartuni ilaasortap aapparisaq Inatsisartut ataatsimiinnerannut atatillugu ingialluinermi angalanermut ineqarnermullu akiliunneqartassaaq.</p> <p><i>Imm. 2.</i> Aappariinnermut naligititaassaaq inuit aqqisa allattorsimaffianni najugaqatigiittut nalunaarsorneqarluni ukiumi ataatsimi inooqatigiinneq.</p> <p><i>Imm. 3.</i> Ilaasortanut Nuummi najugaqanngitsunut qaammatsiutit malillugit ukiut tamaasa ataasiarluni Inatsisartuni ilaasortap qitornai 18 inorlugit ukiullit angerlarsimaffimmi najugallit Inatsisartut ataatsimiinnerannut atatillugu ingialluinermi angalanermut ineqarnermullu akiliunneqartassapput.</p> <p><i>Imm. 4.</i> Inatsisartuni ilaasortaq Naalakkersuisuni ilaasortaajutigippat aapparisaq qitornaaluunniit Inatsisartut ataatsimiinnerannut atatillugu ingialluinermi angalanermut ineqarnermullu akiliunneqassanngillat.</p>	<p><b>1. § 4</b> imatut oqaasertalerneqassaaq: ” <b>§ 4.</b> Inatsisartunut ilaasortat Nuummi najugaqanngitsut aapparisaat aamma qitornai 18-it inorlugit ukiullit angerlarsimaffimmi najugallit qaammatsiutit malillugit ukiut affakkarlugit Inatsisartut ataatsimiinnerannut atatillugu ingialluinermi angalanermut ineqarnermullu akiliunneqartassapput.</p> <p><i>Imm. 2.</i> Inatsisartunut ilaasortat qitornai 18-it inorlugit ukiullit angerlarsimaffimmi najugallit Inatsisartut ataatsimiinnerannut atatillugu ingialluinermi angalanermut ineqarnermullu akiliunneqartassaaq.</p> <p><i>Imm. 3.</i> Inuit nalunaarsorsimaffianni najugaqatigiittut nalunaarsorneqarluni ukiumi ataatsimi inooqatigiinneq aappariinnermut naligititaassaaq.</p> <p><i>Imm. 4.</i> Inatsisartunut ilaasortat Naalakkersuisunut ilaasortaajutigisut imm. 1-3-mi aalajangersakkat malillugit angalanermut ineqarnermullu akiliunneqartassanngillat.”</p>

	<p style="text-align: center;"><b>§ 2</b></p> <p>Inatsisartut inatsisaat ulloq 1. januar 2023 atuutilerpoq.</p>